

潛

夫

論

關化圖書館

Kaohsiung Library

二

開化圖書館

Kaishwa Library

開化圖書館

Kaishua library

開化圖書館

Kaishua library



潜夫論卷第五

精義

斷訟第十九

衰制第二十

勸將第二十一

救邊第二十二

邊議第二十三

實邊第二十四

斷訟第十九

五代不同禮三家不同教非其苟相反也蓋世
推移而俗化異也俗化異則亂原殊故三家符



世皆革定法高祖制三章之約孝文除克膚之
刑是故自非殺傷盜賊文罪之法輕重無常各
隨時宜要取足用勸善消惡而已夫制法之意
若為藩籬溝塹以有防矣擇禽獸之尤可數犯
者而加深厚焉今姦宄雖衆然其原少君事雖
繁然其守約知其原少姦易塞見其守約政易
治塞其原則姦宄絕施其術則遠近治今一歲
斷獄雖以萬計然辭訟之辯鬪賊之發鄉部之
治獄官之治者其狀一也本皆起民不誠信而
數相欺給也舜勅龍以說說殄行震驚朕師乃

自上古患之矣故先慎已唯舌以元示民孔子
曰亂之所生也則言語以爲階小人不恥不仁
不畏不義脉脉規規常懷姦唯昧冒前利不顧
廉恥苟且中後則榆解奴抵以致禍變者比屈
是也非唯細民爲然自封王侯貴戚豪富尤多
有之假舉驕奢以作淫侈高負千萬不肯償責
小民守門號哭啼呼曾無怵惕慙怍哀矜之意
苟崇聚酒徒無行之人傳空引滿啁啾罵詈晝
夜鄂鄂慢游是好或毆擊責主人於死亡羣盜
攻剽劫人無異雖會赦贖不當復得在選辟之

科而州司公府反爭取之且觀諸敢妄驕奢而
作大責者必非救飢寒而解困急振貧窮而行
禮義者也咸以宗驕奢而奉淫泆爾春秋之義
責知誅率孝文皇帝至寡動欲任德然河陽侯
陳信坐負六日免國孝武仁明周陽侯田彭祖
坐當軹侯宅而不與免國黎陽侯邵延坐不出
持馬身斬國除二帝豈樂以錢財之故而傷大
臣哉乃欲絕詐欺之端必國家法防禍亂之原
以利民也故一人伏正罪而萬家蒙乎福者聖
主行之不疑永平時諸侯負責輒有削絀之罰

此其後皆不敢負民而世自節儉辭訟自消矣
今諸侯貴戚或曰勅民慎行德義無違制節謹
度未嘗負責身繫規避志厲青雲或既欺負百
姓上書封祖願且償責此乃殘掠官民而還依
縣官也其誣罔慢易罪莫大焉孝經曰陳之以
德義而民興行示之以好惡而民知禁今欲變
巧僞以崇羨化息辭訟以閒官事者莫若表顯
有行痛誅無狀道示文武之法明詭詐之信今侯
王貴戚不得浸廣姦宄遂多豈謂每有爭鬪辭
訟婦女必致此乎亦以傳見凡諸禍根不早斷

絕則或轉而滋蔓人若斯邪是故原官察之所
以務念臣主之所以憂勞者其本皆鄉亭之所
治者大半詐欺之所生也故曰知其原少則姦
易塞也見其守約則政易持也或婦人之行貴
令鮮絜今以適矣無顏復入甲門縣官原之故
令使留所既入家必未昭亂之本原不惟貞絜
所生者之言也貞女不二心以數變故有匪石
之詩不枉行以遺憂故美歸寧之志一許不改
蓋所以長貞絜而寧父兄也其不循此而二三
其德者此本無廉恥之家不貞專之所也若然

之人又何醜恠輕薄父兄淫僻婦女不惟義理
苟踈一德借本治生逃亡抵中乎以致於刳腹
芟頸滅宗之禍者何所無之先王因人情喜怒
之所能已者則爲之立禮制而崇德讓人所可
已者則爲之設法禁而明賞罰今市賣勿相欺
婚姻無相詐非人情之不可能者也是故不若
立義順法過絕其原初雖慙恠於一人然其終
也長利於萬世小懲而大戒此所以全小而濟
頑凶也夫立法之大要必令善人勸其德而樂
其政邪人痛其禍而悔其行諸一女許數家雖

生十子更百赦勿令得蒙一還私家則此姦絕
矣不則髡其夫妻徙千里外劇縣乃可以毒者
心而絕其後姦亂絕則太平興矣又貞絜寡婦
或男女備具財貨富饒欲守一醮之禮成同穴
之義執節堅固齊懷必死終無更許之慮遭值
不仁世叔無義兄弟或利其娉幣或貪其財賄
或私其兒子則彊中欺嫁處迫脅遣送人有自
縊房中飲藥車上絕命喪軀孤捐童孩此猶迫
脅人命自殺也或後夫多設人客威力脅載守
將抱執連日乃綬與彊掠人爲妻無異婦人軟

弱猥為衆彊所扶與執迫幽阨連日後雖欲復
脩本志嬰綃吞藥

下有缺文

衰制第二十

無慢制而成天下者三皇也畫則象而化四表
者五帝也明法禁而和海內者三王也行賞罰
而齊萬民者治國也君立法而下不行者亂國
也臣作政而君不制者亡國也是故民之所以
不亂者上有吏吏之所以無姦者官有法法之
所以順行者國有君也君之所以位尊者身有
義身有義者君之政也法者君之命也人君思

正以出令而貴賤賢愚莫得違也則君位於上而民氓治於下矣人君出令而貴臣驕吏弗順也則君幾於弑而民幾於亂矣夫法令者君之所以用其國也君出令而不從是與無君等主令不從則臣令行國危矣夫法令者人君之銜轡筆策也而民者君之輿馬也若使人臣廢君法禁而施己政令則是奪君之轡策而已獨御之也愚君闇主託坐於左而姦臣逆道執轡於右此齊駟馬傳所以沈胡公於貝水宋羊叔犗所以弊華元於鄭師而莫之能御也是故陳恒

執簡公於徐州李先害主父於沙丘皆以其毒
素奪君之轡策也文言故曰臣弑其君子殺其
父非一朝一夕之故也其所由來者漸矣由辯
之不蚤變也是故妄違法之吏妄造令之臣不
可不誅也議者必將以為刑殺當不用而德化
可獨任此非變通者之論也非叔世者之言也
夫上聖不過堯舜而放四子盛德不過文武而
赫斯怒詩云君子如怒亂庶遄沮君子如杜亂
庶遄已是故君子之有喜怒也善以止亂也故
有以誅止殺以刑禦殘且夫治世者若登丘矣

必先躡其卑者然後乃得復其高是故先致治
國然後三王之政乃可施也道齊三王然後五
帝之化乃可行也道齊五帝然後三皇之道乃
可從也且夫法也者先王之政也令也者已之
命也先王之政所以衆共也已之命所以獨制
人也君誠能授法而時貸之布令而必行之則
羣臣百吏莫敢不悉心從已令矣已令無違則
法禁必行矣故政令必行憲禁必從而國不治
者未嘗有也此一弛一張以今行古以輕重尊
卑之術也

勸將第二十一

太古之民淳厚敦朴上聖撫之恬澹無爲體道
履德簡刑薄威不殺不誅而民自化此德之上
也德稍弊薄邪心孳生次聖繼之觀民設教坐
爲誅賞以威勸之旣作五兵又爲之憲以正厲
之詩云脩爾輿馬弓矢戈兵用戒作則用逖蠻
方故曰兵之設也久矣涉歷五代以迄于今國
未嘗不以德昌而以兵彊也今兵巧之械盈乎
府庫孫吳之言聒乎將耳然諸將用之進戰則
兵敗退守則城亡是何也哉曰彼此之情不聞

乎主上勝負之數不明乎將心士卒進無利而
自退無畏此所以然也夫服重上阪出馳千里
馬之禍也然節馬樂之者以王良足爲盡力也
先登陷陣赴死嚴敵民之禍也然節士樂之者
以明君可爲效死也凡人所以肯赴死亡而不
辭非爲趨利則因以避害也無賢鄙愚智皆然
顧其所利害有異爾不利顯名則利厚賞也不
避聖辱則避禍亂也非四者雖聖王不能以要
其臣慈父不能以必其子明主深知之故崇利
顯害以與下市使親踈貴賤賢鄙愚智皆必順

我令乃得其欲是以一旦軍鼓雷震旌旗並發
士皆奮激競與死敵者豈其情厭久生而樂害
死哉乃義士且以激其名貪夫且以求其賞爾
今吏從軍敗沒死公事者以十萬數上不聞弔
唁嗟嘆之榮名下又無祿賞之厚實節士無所
勸慕庸夫無所貪利此其所以人懷沮懈不肯
復死也軍起以來暴師五年典兵之吏將下千
數大小之戰歲十百合而希有功歷察其敗無
他故焉皆將不明變勢而士不勸於死敵也其
士之不能死也乃其將不能效也言賞則不與

言罰則不行士進有獨死之禍退蒙衆生之福
此所以臨陣亡戰而競思奔北者也孫子曰將
者智也仁也敬也信也勇也嚴也是故智以折
敵仁以附衆敬以招賢信以必賞勇以益氣嚴
以一令故折敵則能合變衆附愛則思力戰賢
智集則陰謀得賞罰必則士盡力氣勇益則兵
勢自倍威令一則唯將所使必有此六者乃可
折衝擒敵輔王安民前羌始反時將帥以定令
之羣籍富厚之蓄據列城而氣利勢權十萬之
衆將勇傑之士以誅草創新叛散亂之弱虜擊

自至之小寇不能擒滅輒爲所敗令遂雲丞起
合從連橫掃滌并源內犯司隸東寇趙魏西鈔
蜀漢五州殘破六郡削迹此非天之災長吏過
爾孫子曰將者民之司命而國安危之主也是
故諸有寇之郡太守令長不可以不曉兵今觀
諸將旣無斷敵合變之奇復無明賞必罰之信
然其士民又甚貧困器械不簡習將恩不素結
卒然有急則吏以暴發虐其士士以所拙遇敵
巧此爲吏驅怨以禦讎士率縛手以待寇也夫
將不能勸其士士不能用其兵此二者與無兵

等無士無兵而欲合戰其敗負也治數也故曰
其敗者非天之所災將之過也饒士處世但患
無典爾故苟有土地百姓可富也苟有市列商
賈可來也苟有士民國家可疆也苟有法令姦
邪可禁也夫國不可從外治兵不可從中御郡
縣長吏幸得兼此數者丈斷已而不能以稱
明詔安民氓哉此亦陪克闢葺無里之爾夫世
有非常之人然後定非常之事必道非常之失
然後見是故選諸有兵之長吏宜踔躒豪厚越
取幽竒材明權變任將帥者不可苟惟基序或

阿親戚便典兵官此所謂以其國與敵者也

救邊第二十二

聖王之政普覆兼愛不私近密不忽疎遠吉凶禍福與民共之哀樂之情恕以及人視民如赤子救禍如引手爛是以四海歡悅俱相得用往者羌虜背叛始自涼并延及司隸東禍趙魏西鈔蜀漢五州殘破六郡削迹周迴千里野無孑遺寇鈔禍害晝夜不止百姓滅没日月焦盡而內郡之士不被殃者咸云當且放縱以待天時用意若此豈人心也哉前羌始反公卿師尹咸

欲捐棄涼州却保三輔朝廷不聽後羌遂侵而
論者多恨不從惑議余竊笑之所謂媯亦悔不
媯亦有悔者爾未始識變之理地無邊無邊亡
國是故失涼州則三輔爲邊三輔內入則弘農
爲邊弘農內入則洛陽爲邊推此以相況雖盡
東海猶有邊也今不厲武以誅虜選材以全境
而云邊不可守欲先自割便寇敵不亦惑乎昔
樂毅以博博之小燕破滅彊齊威震天下真可
謂良將矣然即墨大夫以孤城獨守六年不下
竟完其民田單師窮率五千騎擊走却復齊七

十餘城可謂善用兵矣圍聊莒連年終不能拔
此皆以至彊攻至弱以上智圖下愚而猶不能
克者何也曰攻常不足而守恒有餘也前日諸
郡皆據列城而擁大衆羌虜之智非乃樂毅田
單也郡縣之阨未若聊莒即墨也然皆不肯專
心堅守而反彊驅劫其民捐棄倉庫背城邑走
由此觀之非苦城乏糧也但苦將不食爾折衝
安民要在任賢不在促境齊魏却守國不以安
子嬰自削秦不以在武皇帝攘夷拆境面數千
里東開樂浪西置燉煌南踰交阯北築朔方卒

定南越誅斬大宛武軍所嚮無不夷滅今虜近
發封畿之內而不能擒亦自痛爾非有邊之過
也脣亡齒寒體傷心痛必然之事又何疑焉君
子見機況已著乎乃者邊害震如雷霆赫如日
月而談者皆諱之日炊并竊盜淺淺善靖俾君
子急欲令朝廷以寇爲小而不蚤憂害乃至此
尚不欲救曰痛不著身言忍之錢不出家言與
之假使公卿子弟有被羌禍朝夕切急如邊民
者則競言當誅羌矣今苟以已無慘怛冤痛故
端坐相仍又不明脩禦之備陶陶問澹卧委天

聽羌獨往來深入多殺已乃陸陸相將詣闕詣
辭禮謝退云狀會坐朝堂則無憂國哀民懇惻
之誠苟轉相顧望莫肯違止日晏時移議無所
定已且須後後得小安則恬然棄忘旬時之間
虜復為害軍書交馳羽檄狎至乃復怔忡如前
若此以來出入九載庶曰式撤覆出為惡何何
潰潰當何終極春秋譏鄭棄其師況棄人乎一
人吁嗟王道為虧況百萬之眾號哭泣咸天心
乎且夫國以民為基貴以賤為本是以聖王養
民愛之如子憂之如家危者安之亡者存之救

其災患除其禍亂是故鬼方之伐非好武也獫狁于攘非貪土也以振民育德安疆宇也古者天子守在四夷自彼互羌莫不來享普天思服行葦賴德況近我民蒙禍若此可無救乎凡民之所以奉事上者懷義恩也痛則無恥福則不仁忿戾怨懟生於無恥今羌叛久矣傷害多矣百姓急矣憂禍深矣上下相從未見休時不一命大將以掃醜虜而州稍稍興役連連不已若排掖障風探沙灌河無所能禦徒自盡爾今數州屯兵才餘萬人皆廩食縣官歲數百萬斛又

有月直但此人耗不可勝供而反憚暫出之費甚非計也是夫危者易傾疑者易化今虜新擅邊地未敢自安易震蕩也百姓新離舊懷思慕未衰易將厲也誠宜因此遣大將誅討迫脅離迭破壞之如寬假日月蓄積富貴各懷安固之後則難動矣周書曰凡彼聖人必趨時是故戰守之策不可不早定也

邊議第二十三

明於禍福之實者不可以虛論惑也察於治亂之情者不可以華飭移也是故不疑之事聖人

不謀浮游之說聖人不聽何者計不背是實而更爭言也是以明君先盡人情不獨委夫良將脩己之備無恃於人故能攻必勝敵而守必自全也羌始反時計謀未善黨與未成人衆未合兵器未備或持竹木枝或空手相附草食散亂未有都督甚易破也然太守令長皆奴怯畏便不敢擊故令虜遂乘勝上彊破州滅郡日長炎災殘破三輔覃及鬼方若此已積十歲矣百姓被害訖今不止而癡兒騃子尚云不當救助且待天時用意若此豈人也哉夫仁者恕己以及

人智者講功而處事今公卿內不傷士民滅沒
之痛外不慮久兵之禍各懷一切所脫避前苟
云不當動兵而不復知引帝王之綱維原禍變
之所終也易制禦寇詩美薄伐自古有戰非乃
今也傳曰天生五材民並用之廢一不可誰能
去兵兵所以威不軌而昭文德也聖人所以興
亂人所以廢齊桓晉文宋襄衰世諸侯猶恥天
下有相滅而已不能救况皇天所命四海主乎
晉楚大夫小國之臣猶恥己之身而有相侵况
天子三公典世任者乎公劉仁德廣被行葦况

含血之人已同類乎一人吁嗟王道爲虧況滅
沒之民百萬乎書曰天子作民父母父母之於
子也豈可坐觀其爲寇賊之所屠剝立視其爲
狗豕之所噉食乎除其仁恩且以計利言之國
以民爲基貴以賤爲本願察開闢以來民危而
國安者誰也上貧而下富者誰也故曰夫君國
將民之以民實瘠而君安得肥夫以小民受天
永命竊願聖主深惟國基之傷病遠慮禍福之
所生且夫物有盛衰時有推移事有激會人有
愛化智者揆象不其宜乎孟明補闕於河西范

蠡收責於故胥是以大功建於當世而今名傳
於無窮也今邊陲搔擾日放族禍百姓晝夜望
朝廷救已而公卿以爲費煩不可徒竊笑之是
以晏子輕困倉之蓄而惜一杯之鑽何異今但
知愛見薄之錢穀而不知末見之待民先也知
徭役出難動而不知中國之待邊寧也詩痛或
不知叫號或慘慘劬勞今公卿苟以己不被傷
故競割國家之地以與敵殺主上之民以餽羌
爲謀若此未可謂知爲臣若此未可謂忠才智
未足使議且凡四海之內者聖人之所以遺子

孫也官位職事者羣臣之所以寄其身也傳子
孫者思安萬世寄其身者各取一闕故常其言
不久行其業不可久厭夫此誠明君之所微察
也而聖主之所獨斷今言不欲動民與煩可也
即然當脩守禦之備必今之計令虜不敢來無
所得令民不患寇既無所失今則不然苟憚民
力之煩勞而輕使受滅亡之大禍非人之主非
民之將非主之佐非勝之主者也且夫議者明
之所見也辭者心之所表也維其有之是以似
之諺曰何以服佞莫若聽之今諸言邊可不救

而安者宜誠以其身若子弟補邊太守令長丞尉然後是非之情乃定揀邊乃無患邊無患中國乃得安寧

實邊第二十四

夫制國者必照察遠近之情偽預禍福之所從來乃能盡羣臣之筋力而保興其邦家前羌始叛草創新起器械未備虜或持銅鏡以象兵或負板案以類楯惶懼擾攘未能相持一城易制爾郡縣皆大熾及百姓暴被殃禍亡失財貨人哀奮怒各欲報讎而將帥皆怯劣軟弱不敢討

擊但坐調文書以欺朝廷實殺民百則言一殺
虜一則言百或虜實多而謂之少或實少而謂
之多傾側巧文要取便身利已而非獨憂國之
大計哀民之死亡也又放散錢穀殫盡府庫乃
復從民假貸彊奪財貨千萬之家削身無餘萬
民遺竭因隨以死亡者皆吏所餓殺也其爲酷
痛甚於逢虜寇鈔賊虜忽然而過未必死傷至
使所搜索剽奪游踵塗地或覆宗滅族絕無種
類或孤婦女爲人奴婢遠見販賣至今不能自
治者不可勝數也此之感天致災尤逆陰陽且

夫士重遷戀慕墳墓賢不肖之所同也民之於
徙甚於伏法伏法不過家一人死爾諸亡失財
貨奪土遠移不習風俗不便水土類多滅門少
能還者代馬望北狐死首丘邊民謹頓尤惡內
留雖知禍人猶願守其緒業死其本處誠不欲
去之極太守令長畏惡軍事皆以素非此土之
人痛不著身禍不及我家故爭郡縣以內遷至
遣吏兵發民禾稼發徹屋室夷其營壁破其生
業彊劫驅掠與其內入捐棄羸弱使死其處當
此之時萬民怨痛泣血叫號誠愁鬼神而感天

心然小民謹劣不能自達闕庭依官吏家迫將
滅嚴不敢有執民既奪土失業又遭蝗旱飢遺
逐道東走流離分散幽冀兗豫荆揚蜀漢飢餓
死亡復失太半邊地遂以兵荒至今無人原禍
所起皆吏過爾夫土地者民之本也誠不可久
荒以開墾且扁鵲之治病也審閉結而通鬱虛
者補之實者瀉之故病愈而名顯伊尹之佐湯
也設輕重而通有無損積餘以補不足故殷治
而君尊賈誼痛於偏枯蹇疢之疾今邊郡千里
地各有兩縣戶財置敢百而太守周迴萬里空

無人民美田棄而莫墾發中州內郡規地拓境不能生邊而口戶百萬田畝一全人衆地荒無所容足此亦偏枯瘳癘之類也周書曰土多人少莫出其材是謂虛土可襲伐也土少人衆民非其民可遺竭也是故土地人民必相稱也今邊郡多害而役劇動入禍門不爲興利除害有以勸之則長無與復之而門有寇戎之心西羌北虜必生闕欲誠大憂也百工制器咸填其邊散之兼倍豈有私哉乃所以固其內爾先聖制法亦務實邊蓋以安中國也譬猶家人遇寇賊

者必使老小羸軟居其中矣丁彊武猛衛其外
內人奉其養外人禦其難蛩蛩距虛更相恃仰
乃俱安存詔書法令二十萬口邊郡十萬歲舉
孝廉一人貢除世舉廉吏一人羌反以來戶口
減少又數易太守至十歲不得舉當職勤勞而
不錄賢俊蓄積而悉衣冠無所覲望農夫無所
貪利是以逐稼中災莫肯就外古之利其民誘
之以利弗脅以刑易曰先王以省方觀民設教
是故建武初得邊郡戶雖數百今歲舉孝廉以
召來人今誠宜權時令邊郡舉孝一人廉吏世

舉一又益置明經百石一人內郡人將妻子來
召著五歲以上與居民同均皆得選舉又募運
民耕邊入穀遠郡千斛近郡二千斛拜爵五大
夫可不欲爵者使食倍賈於內郡如此君子小
人各有所利則雖欲令無徃弗能正也均此苦
樂平徭役充邊境安中國之要術也

潛夫論卷第五

清大論五

十九

開化圖書館

Kaishwa Library

潛夫論卷第六

王符

卜列第二十五

正列第二十六

相列第二十七

卜列第二十五

天地開闢有神民天神異業精氣通行有招召
命有遭隨吉凶之期天難謀斯聖賢雖察不自
專故立卜筮以質神靈孔子稱著之德圓而神
卦之德方以智又曰君子將有行也問焉而已
言其受命而嚮是以禹之得臯陶文王之取呂

尚皆兆告其象卜底其思以成其吉夫君子聞善則勸樂而進聞惡則循省而改尤故安靜而多福小人聞善即懾懼而妄為故狂躁而多禍是故凡卜筮者蓋所問吉凶之情言興衰之期令人脩身慎行以迎福也且聖王之立卜筮也不違民以為吉不專任以斷事故鴻範之占大同是尚書又曰假爾元龜罔敢知吉詩云我龜既馱不我告猶從此觀之著龜之情儻有隨時儉易不以誠邪將世無史蘇之材識神者少乎及周史之筮敬仲莊叔之筮穆子可謂能探賾

索隱鉤深致遠者矣使獻公早納史蘇之言穆子宿備莊叔之戒則驪姬豎牛之讒亦將無由而入無破國危身之禍也聖人甚重卜筮然不疑之事亦不問也甚敬祭祀非禮之祈亦不爲也故曰聖人不煩卜筮敬鬼神而遠之夫鬼神與人殊氣異務非有事故何奈於我故孔子善楚昭之不祀河而惡季氏之旅泰山今俗人筮於卜筮而祭非其鬼豈不惑哉亦有妄傳姓於五音設五宅之符第其爲誣也甚矣古有陰陽然後有五行五帝右據行氣以生人民載世遠

乃有姓名敬民名字者蓋所以別衆猥而顯此人爾非以絕五音而定剛柔也今俗人不能推紀本祖而反欲以聲音言語定五行誤莫甚焉夫魚處水而生鳥據巢而卵即不推其本祖諧音而可即呼鳥爲魚可內之水乎呼魚爲鳥可棲之木邪此不然之事也命駒曰犢終不爲馬是故凡姓之有音也必隨其本生祖所土也太皞木精承歲而王夫其子孫咸當爲角神農火精承熒惑而王夫其子孫咸當爲徵黃帝土精承鎮而王夫其子孫咸當爲宮少皞金精承太

白而王夫其子孫咸當爲商顓頊水精承辰而
王夫其子孫咸當爲羽雖號百變音行不易俗
工又曰商家之宅宜西出門此復虛矣五行當
出乘其勝入居其隩乃安吉商家向東入東入
反以爲金伐木則家中精神日戰鬪也五行皆
然又曰宅有宮商之第直符之歲既然者放其
上增損門數即可以變其音而過其符邪今一
宅也同姓相伐或吉或凶一宮也同姓相伐或
遷或免一宮也成康居之日以興幽厲居之日
以衰由此觀之吉凶興衰不在宅明矣及諸神

祇太歲豐隆鉤陳太陰將軍之屬此乃天吏非
細民所當事也天之有此神也皆所以奉成陰
陽而利物也若人治之有牧守令長矣向之何
怒背之何怨君民道近不宜相責況神致貴與
人異禮豈可望乎且欲使人而避鬼是即道路
不可行而室廬不復居也此謂賢人君子秉心
方直精神堅固者也至如世俗小人醜妾婢婦
淺陋愚戇漸染既成又數揚精破膽今不順精
誠所向而彊之以其所畏直亦增病爾何以明
其然也夫人之所以爲人者非以此八尺之身

也乃以其有精神也人有恐怖死者非病之所
加也非人功之所辜也然而至於遂不損者精
誠去之也蓋奔狎猛虎而不惶嬰人畏螻蟻而
發聞今通士或欲彊羸病之愚人必之其所不
能吾又恐其未盡善也移風易俗之本乃在開
其心而正其精今民生不見正道而長於邪淫
誑惑之中其信之也難卒解也唯王者能變之
正列第二十六

凡人吉凶以行爲主以命爲決行者己之質也
命者天之制也在於己者固可爲也在於天者

不可知也。巫覡祝請亦其助也。然非德不行。巫
史祈祝者，蓋所以交鬼神而救細微爾。至於大
命末如之，何譬民人之請謁於吏矣。可以解微
過，不能脫正罪。設有人於此，晝夜慢侮君父之
教，干犯先王之禁，不克已，心思改過善而苟驟
發，請謁以求解免，必不幾矣。不若脩己，小心畏
慎，無犯上之必令也。故孔子不聽子路而云丘
之禱久矣。孝經云：夫然，故生則親安之，祭則鬼
享之。由此觀之，德義無違，神乃享。鬼神受享，福
祚乃降。故詩云：降福穰穰，降福簡簡。威儀板板。

既醉既飽福祿來反此言人德義茂美神歆享
醉飽乃反報之以福也虢延神而亟亡趙嬰祭
天而速滅此蓋所謂神不歆其祀民不即其事
也故魯史書曰國將興聽於民將亡聽於神楚
昭不禳雲宋景不移谷子產距禘竈邾文公違
卜史此皆審己知道身以俟命者也晏平仲有
言祝有益也詛亦有損也季梁之諫隨侯宮之
竒說虞公可謂明乎天人之道達乎神民之分
矣夫妖不勝德邪不伐正天之經也雖時有違
然智者守其正道而不近於淫鬼所謂淫鬼者

閑邪精物非有守司真神靈也鬼之有此猶人
之有姦言賣平以干求者也若或誘之則遠來
不止而終必有咎鬼神亦然故申繻曰人之所
忌其氣炎以取之人無譽焉妖不自作是謂人
不可多忌多忌妄畏實致妖祥且人有爵位鬼
神有尊卑天地山川社稷五祀百辟卿士有功
於民者天子諸侯所命祀也若乃巫覡之謂獨
語小人之所望畏士公飛尸咎魅北君銜聚當
路直符七神及民間繕治微蔑小禁本非天王
所當憚也舊時京師不防動功造禁以來吉祥

應瑞子孫昌熾不能過前且夫以君畏臣以上
需下則必示弱而取陵殆非致福之招也嘗觀
上記人君身脩正賞罰明者國治而民安民安
樂者天悅喜而增曆數故書曰王以小民受天
永命孔子曰天之所助者順也人之所助者信
也履信思乎順又以尚賢是以自天祐之吉無
不利此最却凶災而致福善之本也

相列第二十七

詩所謂天生烝民有物有則是故人身體形貌
皆有象類骨法角肉各有分部以著性命之期

顯貴賤之表一人之身而五行八卦之氣具焉
故師曠曰赤色不壽火家姓易滅也易之說卦
巽爲人多白眼相揚四白者兵死此猶金伐木
也經曰近取諸身遠取諸物聖人有見天下之
至賾而擬諸形容象其物宜此亦賢人之所察
紀往以知來而著爲憲則也人之相法或在面
部或在手足或在行步或在聲響面部欲溥平
潤澤手足欲深細明直行步欲安穩履載音聲
欲溫和中宮頭面手足身形骨節皆欲相副稱
此其略要也夫骨法爲祿相表氣色爲吉凶候

部位爲年時德行爲三者招天授性命決然表
有顯微色有濃淡行有薄厚命有去就是以吉
凶期會祿位成敗有不必非聰明慧智用心精
密孰能以中昔內史叔服過魯公妣敖聞其能
相人也而見其二子焉叔服曰穀也食子難也
收子穀也豐下必有後於魯及穆伯之老也文
伯居養其死也惠叔與哭魯竟立獻子以續孟
氏之後及王孫說相喬如子上幾商臣子文憂
越椒叔姬惡食我單襄公察晉厲子貢觀邾魯
臧文聽禦說陳咸見張賢人達士察以善心

無不中矣及唐舉之相李允蔡澤許負之相鄧
通條侯雖司命班祿追叙行事弗能過也雖然
人之有骨法也猶萬物之有種類材木之有常
宜巧匠因象各有所授曲者宜爲輿檀宜作輻
榆宜作轂此其正法通率也若有其質而工不
材可如何故凡相者能期其所極不能使之必
至十種之地膏壤雖肥弗耕不獲千里之馬骨
法雖具弗策不致夫觚而弗琢不成於器士而
弗仕不成於位若此者天地所不能貴賤鬼神
所不能貧富也或王公孫子仕宦終老不至於

穀或庶糝廝賤無故騰躍窮極爵位此受天性
命當必然者也詩稱天難忱斯性命之質德行
之招叅錯授不易者也然其大要骨法為主氣
色爲候五色之見王廢有智者見祥脩善迎之
其有憂色循行改尤愚者反戾不自省思雖休
徵見相福轉爲災於戲君子可不敬哉

六月十六日對

潜夫論卷第六

洪州書院

八

--	--	--	--	--	--	--	--	--	--

開化圖書館

Kaifuwa Library

潛夫論卷第七

王符

夢列第二十八

釋難第二十九

夢列第二十八

凡夢有直有象有精有想有人有感有時有反
有病有性在昔武王邑姜方震太叔夢帝謂已
命爾子虞而與之唐及生手掌曰虞因以為名
成王滅唐遂以封之此謂直應之夢也詩云惟
熊惟羆男子之祥惟虺惟蛇女子之祥衆惟魚
矣實惟豐年旒惟旒矣室家綦綦此謂象之夢

也孔子生於亂世日思周公之德夜即夢之此
謂意精之夢也人有所思即夢其到有憂即夢
其事此謂記想之夢也今事貴人夢之即為祥
賤人夢之即為妖君子夢之即為榮小人夢之
即為辱此謂人位之夢也晉文公於城濮之戰
夢楚子伏己而盥其腦是大惡也及戰乃大勝
此謂極反之夢也陰雨之夢使人厭迷陽旱之
夢使人亂離大寒之夢使人怨悲大風之夢使
人飄飛此謂感氣之夢也春夢發生夏夢高明
秋冬夢熱藏此謂應時之夢也陰病夢寒陽病

夢熱內病夢亂外病夢發百病之夢或散或集
此謂氣之夢也人之情心好惡不同或以此吉
或以此凶當各自察常古所從此謂性情之夢
也故先有差武者謂之精晝有所思夜夢其事
乍吉乍善凶惡不信者謂之想貴賤賢愚男女
長少謂之人風雨寒暑謂之感五行王相謂之
時陰極即吉陽極即凶謂之反觀其所疾察其
所夢謂之病心精好惡於事驗謂之性凡此十
者占夢之大略也而決吉凶者之類以多反其
故哉豈人覺爲陽人寐爲陰陰陽之務相反故

邪此亦謂其不甚者爾借如使夢吉事而已意
大喜樂發於心精則真吉矣夢凶事而已意大
恐懼憂悲及發於心精即真惡矣所謂秋冬夢死
傷也吉者順時也雖然財為大害爾由弗若勿
夢也凡察夢之大體清絜鮮好貌堅健竹木茂
美宮室器械新成方正開通光明溫和升上向
興之象皆為吉喜謀從事成諸臭汗腐爛枯槁
絕霧傾倚微邪劓刑不安閉塞幽昧解落墜下
向衰之象皆為計謀不從舉事不成妖孽恠異
可憎可惡之事皆為憂圖畫卹胎刻鏤非真瓦器

虛空皆為見欺給倡優俳優小兒所戲弄之
象皆為觀笑此其大部也夢或甚顯而無占或
甚微而有應何也曰本所謂之夢者困不了察
之稱而懵懵冒名也故亦不專信以斷事人對
計事起而行之尚有不從况於忘忽雜夢亦可
必乎唯其時有精誠之所感薄神靈之所告者
乃有占爾是故君子之異夢非妄而已也必有
事故焉小人之異夢非桀而已也時有真祥焉
是以武丁夢獲聖而得傳說二世夢白虎而其
封夫奇異之夢多有故而少無為者矣人一寢

之夢或屢遷化百物代至而其主不能究道之
故占者有不中也此非古之罪也乃夢者過也
或言夢審矣而說者不能連類傳觀故其惡有
不驗也此非書之罔乃說之過也是故占夢之
難者讀其書為難也夫占夢必謹其變故審其
微候內考情意外考王相即吉凶之符善惡之
効庶可見也且凡人道見瑞而脩德者福必成
見瑞而縱恣者福轉為禍見妖而驕侮者禍必
成見妖而戒懼者禍轉為福是故大姒有吉夢
文王不敢康吉祀于羣神然後占于明堂並拜

吉夢修發戒懼聞喜若憂故能成吉以有天下
虢公夢見蓍收賜之土田目以為有吉因史噐
令國賀夢聞憂而喜故能成凶以滅其封易曰
使知懼又明於憂患與故凡有異夢感心以及
人之吉凶相之氣色無問善惡常恐懼脩省以
德迎之乃其逢吉天祿永終

釋難第二十九

庚子問於潛夫曰堯舜道德不可兩美實若韓
子戈伐之說邪潛夫曰是不知難而不知類今
夫伐者盾也厥性利戈者矛也厥性害是伐為

賊伐為禁也其不俱盛固其術也夫堯舜之相
於人也非戈與伐也其道同仁不相害也舜伐
何如弗得俱堅堯伐何如不得俱賢哉且夫堯
舜之德譬猶偶燭之施明于幽室也前燭即盡
照之矣後燭入而益明此非前燭昧而後燭彰
也乃二者相因而成大光二聖相德而致太平
之功也是故大鵬之動非一羽之輕也騏驥之
速非一足之力也衆良相德而積施乎無極也
堯舜兩美蓋其則也伯叔曰吾子過矣韓非之
取矛盾以喻者將假其不可兩立以詰堯舜之

不得並之勢而論其本性之仁與賊不亦失是
譬喻之音乎潛夫曰夫譬喻也者生於直告之
不明故假物之然否以彰之物之有然否也非
以其文也必以其真也今子舉其實文之性以
喻而欲使鄙也釋其文鄙也惑焉且吾聞問陰
對陽謂之彊說論西詰東謂之彊難子若欲自
必以則昨反思然後求無苟目彊庠子曰周公
知管蔡之惡以相武使肆厥毒從而誅之何不
仁也若其不知何不聖也二者之過必處一焉
潛夫曰書二子挾庠子父以叛然未知其類之

與抑抑相反且天知桀惡而帝之夏又知紂惡
而王之殷使虐二國殘賊下民多縱厥毒滅其
身亦可謂不仁不知乎康子曰不然夫桀紂者
無親於天故天任而弗憂誅之而弗哀今管蔡
之與周公也有兄弟之親有骨肉之恩不量能
而使之不堪命而任之故曰異於桀之與天也
潛夫曰皇天無親帝王繼體之君父事天王者
爲子故父事天也率土之民莫非王臣也將而
必誅王法公也無偏無頗親疎同也大義滅親
尊王之義也立弊之天爲周公之德因斯也過

此而往者未之或知秦子問於潛夫曰耕種生
之本也學問業之末也老聃有言大丈夫處其
實不居其華而孔子曰耕也餒在其中學也祿
在其中敦問今使舉世之人釋耨耒而程相羣
於學何如潛夫曰善哉問君子勞心小人勞力
故孔子所稱謂君子爾今以目所見耕食之本
也以心原道即學又耕之本也易曰立天之道
曰陰與陽立地之道曰柔與剛立人之道曰仁
與義夫反德者為災潛夫曰嗚呼而未此察乎
吾語子夫君子也者其賢宜君國而德宜子民

也。且處此位者，唯仁義人。故有仁義者，謂之君子。昔荀子有言：夫仁也者，愛人；愛人，故不忍危也。義也者，聚人；聚人，故不忍亂也。是故君子夙夜箴規，蹇蹇匪懈者，憂君之危亡，哀民之亂離也。故賢人君子推其仁義之心，愛之君猶父母也。愛居世之民猶子弟也。父母將臨顛隕之患，子弟將有陷溺之禍者，豈能墨乎哉？是以仁者必有勇，而德人必有義也。且夫一國盡亂，無有安身。詩云：莫肯念亂，誰無父母。言將皆為害。然有親者，憂將深也。是故賢人君子既憂民，亦為

身作夫蓋滿於上沾溥在下棟折榱崩懼有厭
患故大屋移傾則下之人不待告令各爭其柱
之仁者兼護人家者且自爲也易曰王明並受
其福是以次室倚立而嘆嘯楚女揭幡而激王
仁惠之恩忠愛之情固能已乎

十七日讀此卷 亭列一篇亦固矣

潛夫論卷第七

清
大
論
上

開化圖書館
Kankwa library

潛夫論卷第八



交際第三十

明忠第三十一

本訓第三十二

德化第三十三

五德第三十四

交際第三十

語曰人惟舊器惟新昆弟世疎朋友世親此交際之理人之情也今則不然多思遠而忘近背故而向新或歷載而益疎或中路而相捐悟先

聖之典戒負久要之誓言斯何故哉退而省之
亦可知也勢有常趣理有固然富貴則人爭附
之此勢之常趣也貧賤則爭去之此理之固然
也夫與富貴交者上有稱譽之用下有貨財之
益與貧賤交者大有賑貸之費小有假借之損
今使官人雖兼桀跖之惡苟結駟而過士士猶
以榮而歸焉况其實有益者乎使處子雖苞顏
閔之賢苟被褐而造門人猶以為辱而恐其復
來况其實有損者乎故富貴易得宜貧賤難得
適好服謂之奢僭惡衣謂之困厄徐行謂之飢

餒疾行謂之逃責不候謂之倨慢數來謂之求
食空造以爲無意奉贄以爲欲貸恭謙以爲不
肖抗揚以爲不得此處子之羈薄貧賤之苦酷
也夫處卑下之位懷北門之殷憂內見謫於妻
子外蒙譏於士夫嘉會不從禮餞御不逮衆貨
財不足以合好力勢不足以杖急歡忻久交情
好曠而不接則人無故自廢踈矣漸踈則賤者
逾自嫌而日引貴人逾務黨而忘之夫以逾踈
之賤伏於下流而望日忘之貴此谷風所爲內
摧傷而介推所以赴深山也夫交利相親交害

相踈是故長棘誓而廢心無用者也交漸而親
必有益者也俗人之相於也有利生親積親生
愛積愛生是積是生賢情苟賢之則不自覺心
之親之口之譽之也無利生踈積踈生憎積憎
生非積非生惡情苟惡之則不自覺心之外之
口之毀之也是故富貴雖新其勢日親貧賤雖
舊其勢日除此處子所以不能與官人競也世
主不察朋交之所生而苟信貴臣之言此繫士
所以獨隱翳而姦雄所以黨飛揚也昔魏其之
客流於武安長平之吏移於冠軍廉頗程公載

盈載虛夫以四君之賢藉舊貴之夙恩客猶若
此則又況乎生貧賤者哉唯有古烈之風志義
之士爲不然爾恩有所結終身無解心有所矜
賤而益篤詩云淑人君子其儀一兮心如結兮
故歲寒然後知松栢之後凋也隘然後知其入
之篤固也候羸豫讓出身以報恩縛諸荆軻奮
命以効用故死可爲也處之難爾龐勛敦詔一
旦見收亦立爲義報况累舊乎故鄒陽稱之曰
桀之狗可使吠堯跖之客可使刺由豈虛言哉
俗士淺短急於目前見赴有益則先至顧無用

則後輩是以欲速之徒競推上而不暇接下爭
逐前而不遑卹後是故韓安國能遺田蚡五百
金而不能賑一窮翟方進稱淳于長而不能薦
一士夫安國方進前世之忠良也而猶若此則
又況乎末塗之下相哉此奸雄所以逐黨進而
處子所以愈擁蔽也非明聖之君孰能照察且
夫怨惡之生若二人偶焉苟相對也恩情相向
推極其意精誠相射貫心達髓愛樂之隆輕相
爲死是故侯生豫子刎頸而不恨苟相背也心
情乖牙推極其意分背奔馳窮東極西心尚未

決是故陳餘張耳老相全滅而無感痛從此觀
之交際之理其情大矣非獨朋友為然君臣夫
婦亦猶是也當其歡也父子不能問及其乖也
怨讎不能先是故聖人常慎微以敦其終富貴
未必可重貧賤未必可輕人心不同好度量相
萬億許由讓其帝位俗人有爭縣職孟軻辭祿
萬鍾小夫貪於升食故曰鶉鷄羣游終日不休
亂舉聚時不離蒿茆鴻鵠高飛雙別乖離通千
達萬志在陂池鸞鳳翱翔黃歷之上徘徊太清
之中隨景風而飄颻時抑揚以從容意猶未得

喑喑然長鳴蹙蹙振翼陵朱雲薄升極呼吸陽
露曠旬不食其意尚猶噉噉如也三者殊務各
安所爲是以伯夷採薇而不恨巢父木棲而自
願由斯觀諸士之志量固難測度凡百君子未
可以富貴驕貧賤謂貧賤之必我屈也詩云德
輜如毛民鮮克舉之世有大勇者四而人莫之
能行也一曰恕二曰平三曰恭四曰守夫恕者
仁之本也平者義之本也恭者禮之本也守者
信之本也四本並立四行乃具四行具存是謂
真賢四本不立四行不成四行無一是謂小人

所謂恕者君子之人論彼恕於我動作友聲故人君不開精誠以示賢忠賢忠亦無以得達易曰王明並受其福是以忠臣必待明君乃能顯其節良吏必得察主乃能成其功君不明則大臣隱下不過忠又羣司舍法而阿貴夫忠言所以為安也不貢必危法禁所以為治也不奉必亂忠之貢與不貢法之奉與不奉其秉皆在於君非臣下之所能為也是故聖人求之於己不以責下凡為人上法術明而賞罰必者雖無言語而勢自治治賈一倍以相高苟能富貴雖積

狡惡爭稱譽之終不見非苟處貧賤恭謹祇為
不肖終不見是此俗化之所以浸敗而禮義之
所以消衰也世有可逸者三三者何曰情實薄
而辭稱厚念實忽而文想憂懷不來而外克期
不信則懼失賢信之則註誤人此俗世可馱之
甚者也是故孔子疾夫言之過其行者詩傷蛇
蛇碩言出自口矣巧言如簧顏之厚矣今世俗
之交也未相照察而求深固探懷扼腕拊心祝
詛苟欲相護論議而已分背之日既得之後則
相棄忘或受人恩德先以濟度不能拔舉則因

毀之爲生瑕釁明言我不遺力無奈自不可爾
詩云知我如此不如無生先合而後忤有初而
無終不若本無生意彊自誓也君子屢盟亂是
用長大人之道周而不比微言相感掩若同符
又焉用盟孔子恂恂似不能言者又稱闇闇言
唯謹也士貴有辭亦憎多口故曰文質彬彬然
後君子與其不忠剛毅木訥尚近於仁嗚呼哀
哉凡今之人言方行圓口正心邪行與言謬心
與口違論古則知稱夷齊原顏言今則必官爵
職位虛談則知以德義爲賢貢薦則必閥閱爲

前處子雖躬顏閔之行性勞謙之質秉伊呂之才懷救民之道其不見資於斯世也亦已明矣
明忠第三十一

人君之稱莫大於明人臣之譽莫美於忠此二德者古來君臣所共願也然明不繼踵忠不萬一者非必愚闇不逮而惡名揚也所道求之非其道之爾夫明據下起忠依上成二人同心則利斷金能如此者兩譽俱具要在於明操法術自握權秉而已矣所謂術者使下不得欺也所謂權者使勢不得亂也術誠明則雖萬里之外

幽冥之內不得不求効權誠用則遠近親踈貴
賤賢愚無不歸心矣周室之末則不然離其術
而舍其權怠於己而恃於人是以公卿不思忠
百僚不盡力君王孤蔽於上兆黎寃亂於下故
遂衰微侵奪而不振也夫帝王者其利重矣其
威大矣徒懸重利足以勸善徒設嚴威可以懲
奸乃張重利以誘民操大威以驅之則舉世之
人可令冒白刃而不恨赴湯火而不難豈云但
率之以共治而不宜哉若鷹也然獵夫御之猶
使終日奮擊而不敢怠豈有人臣而不可使盡

力者乎詩云伐柯伐柯其則不遠夫神明之術
其在君身而忽之故令臣鉗口結舌而不敢言
此耳目所以蔽塞聰明所以不得也制下之權
日陳君前而君釋之故令君臣懈弛而背朝此
威德所以不照而功名所以不建也詩云我雖
異事及爾同僚我即爾謀聽我敖敖夫惻隱人
皆有之是故耳聞啼號之音無不爲之慘悽悲
懷而傷心者目見危急之事無不爲之灼怛驚
而赴救之者君臣義重行路禮輕過耳悟目之
交未恩未德非貧非貴而猶若此則又况於北

面稱臣被寵者乎是故進忠扶危者賢不肖之
所共願也誠皆願之而行違者常苦其道不利
而有害言未得言而身敗爾歷觀古來愛君憂
主敢言之臣治勢一成君自不能亂也況臣下
乎法術不明而賞罰不必者雖曰號令然勢自
亂亂勢一成君自不能治也況臣下乎是故勢
治者雖委之不亂勢亂者雖勤之不治也堯舜
恭己无爲而有餘勢治也胡亥王莽馳騁勢亂
也故曰善者求之於勢弗責於人是以前王審
法度而布教令不行私以欺法不黷教以辱命

故臣下敬其言而奉其禁竭其心而稱其職此
由法術明而威權任也夫術之爲道也精微而
神言之不足而行有餘有餘故能兼四海而照
幽冥權之爲勢也健悍以大不待貴賤操之者
重重故能奪主威而順當也是以明君未嘗示
人術而借下權也孔子曰可與權是故聖人顯
諸仁藏諸用神而化之使民宜之然後致其治
而成其功功業效於民美譽傳于世然後君乃
得稱明臣乃得稱忠此所謂明據下作忠依上
成二人同心其利斷金也

本訓第三十二

上古之世太素之時元氣窈冥未有形兆萬精
合并混而爲一莫制莫御若斯久之翻然自化
清濁分別變成陰陽陰陽有體實生兩儀天地
壹鬱萬物化淳和氣生人以統理之是故天本
諸陽地本諸陰人本中和三才異務相待而成
各循其道和氣乃臻璣衡乃平天道日施地道
日化人道日爲爲者蓋所謂感通陰陽而致珍
異也人行之動天地譬猶車上御駟馬蓬中擢
自照矣雖爲所覆載然亦在我何所之可孔子

曰時乘六龍以御天言行君子所以動天地也
可不慎乎從此觀之天呈其兆人序其動書故
曰天功人其代之如蓋理其政以和天氣以臻
其功是故道德之用莫大於氣道者之根也氣
所變也神氣之所動也當此之時正氣所加非
唯於人百穀草木禽獸魚鼈皆口養其氣聲入
於耳以感於心男女聽以施精神資和以化
民之胎含嘉以成體及其生也和以養性美在
其中而暢於四肌實於血脉以心性志耳目
精欲無不貞廉潔懷履行者此五帝三王所以

能畫法像而民不違正己德而世自化也是故
法令刑賞者乃所以治民事而致整理爾未足
以興大化而升太平也夫欲歷三正之絕迹臻
帝皇之極功者必先原元而本本興道而致和
以淳粹之氣生敦龐之民明德義之表作信厚
之心然後化可美而功可成也

德化第三十三

人君之治莫大於道莫盛於德莫美於教莫神
於化道者所以持之也德者所以苞之也教者
所以知之也化者所以致之也民有性有情有

化有俗情性者心也本也化俗者行也末也末
生於本行起於心是以上君撫世先其本而後
其末慎其心而理其行心精苟亡則姦匿所作
邪意無所載矣夫化變民心也猶政變民體也
德政加於民則多滌暢姣好堅彊考壽惡政加
於民則多罷癘疴病夭昏扎瘥故尚書美考終
命而惡凶短折國有傷明之政則民多病因有
者道之使也必有其根其氣乃生必有其使變
化乃成是故道之爲物也至神以妙其爲功也
至彊以大天之以動地之以靜日之以光月之

以明四時五行鬼神人民億兆醜類變異吉凶
何非氣然及其乖戾天之尊也氣裂地之大也
氣動山之重也氣徙水之流也氣絕之日月神
也氣蝕之星辰虛也氣墮之旦有晝晦宵有大
風飛車拔樹積雷爲冰溫泉成湯麟龍鸞鳳螭
壘蟻蝗莫不氣之所爲也以此觀之氣運感動
亦誠大矣變化之爲何物不能是故上聖故不
務治民事而務治民心故曰聽訟吾猶人也必
也使無訟乎導之以德齊之以禮務厚其情而
明則務義民親愛則無相害傷之意動思義則

無姦邪之心夫若此者非律之所使也非威刑之所彊也此乃教化之所致國有傷聰之政則民多病身有傷賢之政則賢多橫夭夫形體骨幹爲堅彊也然猶隨政變易又況乎心氣精微不可養哉詩云敦彼行葦羊牛勿踐履方苞方體惟葉握握又曰戴飛厲天魚躍于淵愷悌君子胡不作人公劉厚德恩及草木羊牛六畜且猶感德消息於心己之所無不以責下我之所有不以譏彼感己之好敬也故接士以禮感己之好愛也故遇人有恩己欲立而立人已欲達

而達人善人之憂我也故先勞人惡人之忘我也故常念人凡品則不然論人不恕己動作不思心無之己而責之人有之我而譏之彼己無禮而責人敬己無恩而責人愛貧賤則非人之不我憂也富貴則是我之不憂人也行己若此難以稱仁矣所謂平者內懷尸鳩之恩外執砥天之心論士必定於志行毀譽必參於效驗不隨俗而雷同不逐聲而寄論苟善所在不譏貧賤苟惡所錯不忌富貴不諂上而慢下不猷故而敬新凡品則不然內偏頗於妻子外僭惑於

知友得則譽之怨則謗之平議無惇均譏譽無
效驗苟阿貴以比黨苟剝聲以羣吠事富貴如
奴僕視貧賤如傭客百至秉權之門而不一至
無勢之家執心若此難以稱義所謂恭者內不
敢傲於室家外不敢慢於士大夫見賤如貴視
少如長其禮先入其言後出恩意無不答禮敬
無不報覩賢不居其上與人推讓事處其勞居
從其德位安其卑養甘其薄凡品則不然內慢
易於妻子外輕侮於知友聰明不別真僞心思
不別善醜愚而喜傲賢少而好陵長恩意不相

答禮敬不相報覩賢不相推會同不能讓動欲
擇其佚居欲處其安養欲擅其厚位欲爭其尊
見人謙讓因而嗤之見人恭敬因而傲之如是
而自謂賢能智慧為行如此難以稱忠所謂守
者心也有度之士情意精專心思獨覩不驅於
險墟之俗不惑於衆多之口聰明懸絕秉心塞
淵獨立不懼遜世無悶心堅金石志輕四海故
守其心而成其信凡器則不然內無持操外無
準儀傾側險詖求同於心口無定論不恒其德
二三其行秉操如此難以稱信夫是四行者其

輕如毛其重如山君子以爲易小人以爲難孔子曰仁遠乎哉我欲仁仁斯至矣又稱知德者寡俗之偏黨自古而然非乃今也凡百君子競於驕僭貪樂慢傲如忠信未達而爲左右所掬按當世而覆被更爲否惡惡狀之臣者豈可勝哉孝成終沒之日不知王章之直孝哀終沒之日不知王嘉之忠也此後賢雖有憂君哀主之情忠誠正直之節然猶且沈吟觀聽行己者也鳴鶴在陰其子和之相彼鳥矣猶求仁不忍踐履生草則又況於民萌而有不化者乎君子脩

其樂易之德上及飛鳥下及淵魚不歡忻悅豫
則又況士庶而不仁者乎聖深知之皆務正已
以爲表明禮義以爲教和德氣於未生之前正
表義於咳笑之後民之胎也合中和以成其生
也立方正以長是以爲仁義之心廉恥之志骨
著脉通與體俱生而無麤穢之氣無邪淫之欲
雖放之大荒之外措之幽冥之內終無違禮之
之行投之危亡之地納之鋒鏑之間終無苟全
之心舉世之人行皆若此則又烏所得亡夫姦
亂之民而加辟哉上天之載無聲無臭儀形文

王萬邦作孚此姬氏所以崇美於前而致刑錯
於後聖人其尊德禮而卑刑罰故舜先勅契以
敬敷五教而後命皋陶以五刑三居是故凡立
法者非以司民短而誅過誤乃以防姦惡而救
禍敗檢淫邪而內正道爾詩云民之秉夷好是
懿德故民有心也猶爲種之有園也遭和氣則
秀茂而成實遇水旱則枯槁而生孽民蒙善化
則有士君子之心被惡政則人有懷姦亂之慮
故善者之養天民也猶良工爲麴鼓也起居以
其時寒溫得其適則一蔭之麴鼓盡美而多量

其愚拙工則一蔭之麴豉皆臭敗而棄損今六合亦由一蔭也黔首之屬猶豆麥也變化云爲在將者爾遭良吏則皆懷忠信而履仁厚遇惡吏則皆懷姦邪而行淺薄忠厚積則致太平姦薄積則致危亡是以聖帝明王皆敦德化而薄威刑德者所以脩己也威者所以治人也上智則下愚之民少而中庸之民多中民之生世也猶鑠金之在鑪也從篤變化唯冶所爲方圓薄厚隨鎔制爾是故世之善否俗之薄厚皆在於君上聖和氣以化民心正表儀以率羣下故能

使民比屋可封堯舜是也其次躬道德而敦慈
愛美教訓而崇禮讓故能使民無爭心而致刑
錯文武是也其次明好惡而顯法禁平賞罰而
無阿私故能使民辟姦邪而趨公正理弱亂以
致治彊中興是也治天下身處汙而放情怠民
事而急酒樂近頑童而遠賢才親諂諛而踈正
直重賦稅以賞無功妄加喜怒以傷無辜故能
亂其政以敗其民弊其身以喪其國者幽厲是
也孔子曰三人行必有我師焉擇其善者而從
之其不善者我則改之詩美宜鑒于殷自求多

福是故世主誠能使六合之內舉世之人咸懷
方厚之情而無淺薄之惡各奉公政之心而無
姦險之慮則羲農之俗復見于茲麟龍鸞鳳復
畜于郊矣

五德志第三十四

自古在昔天地開闢三皇迭制各樹號謚以紀
其世天命五代正朔三復神明感生愛興有國
亡于嫫以滅於積惡神微精以天命罔極或皇
馮依或繼體育太暉以前尚矣迪斯用來頗可
紀錄雖一精思議而復誤故撰古訓著五德志

世傳三皇五帝多以為伏羲神農為三皇其一
者或曰燧人或曰祝融或曰女媧其是與非未
可知也我聞古有天皇地皇人皇以為或及此
謂亦不敢明凡斯數其於五經皆無正文故略
依易繫記伏羲以來以遺後賢雖多未必獲正
然罕可以浮游博觀共求厥真大人迹出雷澤
華胥履之生伏羲其相日角世號太暉都于陳
其德木以龍紀故為龍師而龍名作八卦結繩
為網以漁後嗣帝嚳代顓頊氏其相戴十其號
高辛厥質神靈德行祇肅迎逆日月順天之則

能叙三辰以周民作樂六英世有才子八人伯
奮仲堪叔獻季仲伯虎仲雄叔豹季狸忠肅恭
懿宣慈惠和天下之人謂之八元後嗣姜嫄履
大人迹生姬棄厥相披頤爲堯司徒又主播種
農植嘉穀堯遭水災萬民以濟故舜命曰后稷
初烈山氏之有天下也其子曰柱能植百穀故
立以爲稷自夏以上祀之周之興也以棄代之
至今祀之大姪夢長人感已生文王厥相四乳
爲西伯興於岐斷虞芮之訟而始受命武王駢
齒勝殷過劉成周道姬之別封衆多管蔡成霍

魯衛毛聃郃雍曹滕畢原鄆郇文之昭也邶晉
應韓武之穆也凡蔣邢邠柞祭周公之胤也周
召號吳隨邠方邛自潘養滑鎬宮密榮丹郭楊
逢管唐韓楊觚藥甘鱗虞王氏皆姬姓也有神
龍首出常感姪姒生赤帝魁隗身豨炎帝世豨
神農代伏羲氏其德火紀故爲火師而火名是
以斲木爲耜揉木爲耒耨日中爲市致天下之
民聚天下之貨交易而退各得其所後嗣慶都
與龍合婚生伊堯代高辛氏其眉八彩世豨唐
作樂大章始禘位武王克殷而封其冑於鑄含

始吞赤珠剋曰玉英生漢龍感女媧劉季興大
電繞樞炤野感符寶生黃帝軒轅代炎帝氏其
相龍顏其德土行以雲紀故爲雲師而雲名作
樂咸池是始制衣裳後嗣握登見大虹意感生
重華虞舜其目重瞳事堯堯乃禪位曰格爾舜
天之曆數在爾躬允執厥中四海困窮天祿永
終乃受終于文祖也舜有虞作樂九韶禪位於
禹武王克殷而封胡公媯滿於陳庸以元女大
姬大星如虹下流華渚女節萬接生白帝摯于青
陽世號少暉代黃帝氏都于曲阜其德金行其

立也鳳皇適至故紀於鳥鳳氏曆正也玄鳥氏
司分者也伯趙氏司至者也青鳥氏司啓者也
丹鳥氏司閉者也祝鳩氏司徒也睢鳩氏司馬
也尸鳩氏司空也爽鳩氏司寇也鶡鳩氏司事
也五鳩鳩民者也五雉爲五工正利器用夷民
者也是故作書契百官以治萬民以察有才子
四人曰重曰該曰脩曰熙實能金木及水故重
爲勾芒該爲蓐收脩及熙爲玄冥恪恭厥業世
不失職遂濟窮桀後嗣脩紀見流星意感生白
帝文命我禹其耳參漏爲堯司空主平水土命

山川畫九州制九貢功成賜玄珪以告勲于天
舜乃禪位命如堯詔禹乃即位作樂大夏世號
夏后傳嗣子啓啓子太康仲康更立兄弟五人
皆有昏德不堪帝事降須洛汭是謂五觀孫相
嗣位夏道浸衰於是后羿自鉏遷于窮石因夏
民以代夏政滅相妃后緡方娠逃出自竇奔于
有仍生少康焉仍妃牧正羿恃已射也不脩民
事而淫于原獸棄武羅伯因熊髡危圍而用寒
浞浞栢明氏讒子弟也栢明氏惡而棄之夷羿
取之信而使之以為已相浞行媚于內施賂于

外愚弄于民虞羿于田樹之詐匿以取其國家
外內咸服羿猶不悛將歸自田家衆殺而烹之
以食其子子不忍食諸死于窮門靡奔于有鬲
氏浞因羿室生澆及豷恃其讒慝詐偽而不德
于民使澆用師滅斟灌及斟尋氏處豷于過處
澆于戈使椒求少康逃奔有虞爲之胞正虞思
妻以二妃而邑諸綸有田一成有衆一旅能布
其德而兆其謀以收夏衆撫其官職靡自有萬
收二國之燼以滅浞而立少康焉乃使女艾誘
澆使后杼誘豷遂滅過戈復禹之績祀夏

配天不失舊物十有七世而桀亡天下武王克
殷而封其後於杞或封於緇又封少皞之曹於
祁澆才力蓋衆驟其勇武而卒以亡故南宮括
曰羿善射奡盪舟俱不得其死也姒姓分氏夏
后有扈有南斟尋泊胤辛襄費戈冥緇皆禹後
也搖光如月正日感女樞幽防之宮生黑帝顓
頊其相駢幹身號高陽世號共工代少皞氏其
德水行以水紀故爲水師而水名承少皞衰九
黎亂德乃命重黎討訓服曆象日月東西南北
作樂五英有才子八人蒼舒隤凱擣演大臨危

降庭堅仲容叔達齊聖廣淵明允篤誠天下之
人謂之八凱共工氏有子曰勾龍能平九土故
號后土死而爲杜天下祀之娥簡吞燕卵生子
契爲堯司徒職親百姓順五品扶都見白氣貫
月意感生黑帝子履其相二肘身號湯世號殷
致太平後襄乃生武丁即位默以不言思道三
年而夢獲賢人以爲師乃使以夢像求之四方
側陋得傳說方以胥靡築於傅巖升以爲大公
而使朝夕規諫恐其布憚怠也則勅曰若金用
汝作礪若濟巨川用汝作舟楫若時大旱用汝

作霖雨啓乃心沃朕心若藥不瞑眩厥疾不瘳
若跣不視地厥足用傷爾交脩余無棄故能中
興稱號高宗及帝辛而亡天下謂之紂武王封
微子於宋封箕子於朝鮮子姓分氏殷時來宋
劫蕭空同北段皆湯後也

潛夫論卷第八

開化圖書館
kaikwa library

潛夫論卷第九

王符

志氏姓第三十五

昔者聖王觀象於乾坤考度於神明探命曆之
去就省羣后之德業而賜姓命氏因彰德功傳
稱氏之徹官百王公之子第千世能聽其官者
而物賜之姓是謂百姓姓有徹品於王謂之
千品昔堯賜契姓姬賜禹姓妣氏曰有夏伯夷
爲姜氏曰有呂下及三代官有世功則有官族
邑亦如之後世微末因是以爲姓則不能故也
故或傳本姓或氏號邑謚或氏於爵或氏於志

若夫五帝三王之世所謂號也文武昭景成宣
戴栢所謂謚也齊魯吳楚秦晉燕趙所謂國也
王氏侯氏王孫公孫所謂爵也司馬司徒中行
下軍所謂官也伯有孟孫子服叔子所謂字也
至氏匠氏陶氏所謂事也東門西門南宮東郭
北郭所謂居也三烏五鹿青牛白馬所謂志也
凡厥姓氏皆出屬而不可勝紀也

衛侯滅邢昭公娶同姓言皆同祖也近古以來
則不必然古之賜姓大諦可用其餘則難周室
衰微吳楚僭號下歷七國咸各稱王故王氏王

孫氏公孫氏及謚氏官國自有之千八百國謚
官萬數故元不可同也及孫氏者或王孫之班
也或諸孫之班也故同祖而異姓有同姓而異
祖亦有雜錯變而相入或從母姓或避怨讎夫
吹律定姓唯聖能之今民散久鮮克遠音律天
主尊正其祖故且略紀顯者以待士合揖損馬
伏羲姓風其後封任宿湏胸顓臾四國實司太
暉與有濟之祀且為東蒙主魯僖公母成風蓋
湏胸之女也季氏欲伐顓臾而孔子譏之炎帝
苗胄四嶽伯夷為堯典禮折民惟刑以封申呂

裔生尚爲文王師克殷而封之齊或封許向或
封於紀或封於申城在南陽宛北序山之下故
詩云豐鹽申伯王薦之事于邑于序南國爲式
宛西三十里有呂望許在潁川今許縣是也姜
戎居伊洛之間晉惠公徙置陸渾州薄甘戲露
帖及齊之國氏高氏襄隰氏士氏強氏東郭氏
雍門氏子雅氏子尾氏子襄氏子淵氏子乾氏
公旗氏翰公氏賀氏盧氏皆姜姓也

黃帝之子二十五人班爲十二姬酉祁已勝箴
伾拘釐姑衣氏也當春秋晉有祁奚舉子薦讎

以忠直著莒子姓已氏夏之興有任奚爲夏車
正以封於薛後遷于邾其嗣仲虺居薛爲湯左
相王季之妃大任及謝章昌采祝結泉卑遇狂
大氏皆任姓也台氏女爲后稷元妃繁育周先
媯氏封於燕及鄭文公有賤妾燕媯夢神與之
蘭曰余爲伯儵余而祖也以是有國香人服媚
及文公見媯賜蘭而御之媯言其夢且曰妾不
才幸而有子將不信敢徵蘭乎公曰諾遂生穆
公媯氏之別有闞尹蔡光魯雍斷密湏氏及漢
河東有郅都汝南有郅君章姓音與古媯同而

書其字異二人皆著名當世

少皞氏之世衰而九黎亂德顓頊受之乃命南
正重司天以屬神命火正黎司地以屬民使復
舊常無相侵瀆是謂絕地天通夫黎顓頊氏裔
子吳回也為高辛氏火正淳耀天明地德光四
海也故名祝融後三苗復九黎之德堯繼重黎
之後不忘舊者羲伯復治之故重黎氏世序天
地別其分主以歷三代而封於程其在周世為
宣王大司馬詩美王謂尹氏命程伯休父其後
失守適晉為司馬遷自謂其後祝融之孫分為

八姓已禿彭姜妘曹斯牟已姓之嗣颺叔安其
裔子曰董父實甚好龍能求其嗜欲以飲食之
龍多歸焉乃學擾龍以事帝舜賜姓曰董氏曰
豢龍封諸媮川媮夷彭姓豕韋皆能馴龍者也
豢龍逢以忠諫桀殺之凡因祝融之子孫已姓
之班昆吾藉扈溫董禿姓媮夷豢龍則夏滅之
祖姓彭祖豕韋諸稽則商滅之姜姓會人則滅
之妘姓之後封於鄔會路偃陽鄔取仲任爲妻
貪冒愛恠蔑賢簡能是用亡邦會在河伊之間
其君驕貪嗇儉滅爵損祿羣臣卑讓上下不臨

詩人憂之故作羔裘閔其痛悼也匪風異君先
 教也會仲不悟重氏伐之上下不能相使禁罰
 不行遂以見亡路子嬰兒娶晉成公姊為夫人
 鄆舒為政而虐之晉伯宗怒遂伐滅路荀瑩武
 子伐滅偃陽曹姓封於邾邾顏子之支別為小
 邾皆楚滅之芊姓之裔熊嚴成王封之於楚是
 謂粥熊又豨粥子生四人伯霜仲雪叔熊季紉
 紉嗣為刑子或封於夔或封於越夔子不祀祝
 融粥熊楚伐滅公族有楚季氏列宗氏闞強氏
 良臣氏耆氏門氏侯氏季融氏仲熊氏子季氏

陽氏無鈞氏為氏善氏陽氏昭氏景氏嚴氏嬰
齊氏來氏來織氏即氏申氏訥氏沈氏賀氏滅
氏吉白氏伍氏沈濺氏餘推氏公建氏子南氏
子庚氏子午氏西氏王孫田公氏舒堅氏魯陽
氏黑肱氏皆芊姓也

楚季者王子敖之曾孫也公室冒主為章者王子
無鈞也令尹孫叔敖者為章之子也左司馬戌
者莊王之曾孫也葉公諸梁者戌之第三弟也
楚大夫申无畏者又氏文氏初紂有蘇氏以妲
己女而亡殷周武王時有蘇忿生為司寇而封

溫其後洛邑有蘇秦高陽氏之世有才子八人
蒼舒隕凱擣戡大臨龙降庭堅仲容叔達天下
之人謂之八凱後嗣有皐陶事舜舜曰皐陶蠻
夷滑夏寇賊姦宄女作士其子伯翳能議百姓
以佐舜禹擾馴鳥獸舜賜姓嬴後有仲衍鳥體
人元爲夏帝大戊御嗣及費仲生惡來季勝武
王伐紂并殺惡來季勝之後有造父以善御事
周穆王穆王游西海忘歸於是徐偃作亂造父
御一日千里以征之王封造父於趙城因以爲
氏其後失守至於趙夙仕晉卿大夫十一世而

爲列侯五世而爲武靈王五世亡趙恭叔氏邯鄲氏此言辱氏嬰齊氏樓季氏盧氏原氏皆趙嬴姓也惡來後有非子以善畜周孝封之於秦世地理以爲西陲大夫沂秦高是也其後列於諸侯五世而稱王六世而始皇生於邯鄲故曰趙政及梁葛江黃徐莒慕六英皆臯陶之後也鍾離運掩菟裘尋梁脩魚白寘飛廉密如東灌良時白巴公巴公巴郊復蒲皆嬴姓也帝堯之後爲陶唐氏後有劉累能畜龍孔甲賜姓爲御龍以更豕韋之後至周爲唐杜氏周衰有隰叔

子違周難于晉國生子輿爲李以正於朝朝無
閒官故氏爲士氏爲司空以正於國國無敗績
故氏司空食采隨故氏隨氏士爲之孫會佐文
襄於諸侯無惡爲卿以輔成景軍無敗政爲成
率居傅端刑法法集訓典國無姦民晉國之盜
逃奔于秦於是晉侯爲請冕服于王王命隨會
爲卿是以受范卒謚武子武子文成晉荆之盟
降兄弟之國使無閒隙是以受郇櫟由此帝堯
之後有陶唐氏劉氏御龍氏唐杜氏隰氏士氏
季氏司空氏趙氏范氏郇氏櫟氏嬴氏冀氏穀

氏普氏擾氏樵氏傅氏楚氏令尹建嘗問范武
子之德於文子文子對曰夫子之家事治言於
晉國竭情無私其祝史陳信不媿其家事無猜
其祝史不祈建歸以告康王曰神人無怨宜夫
子之股肱五君以爲諸侯主也故劉氏自唐以
下漢以上德著於世莫若范會之最盛也斯亦
有脩己以安人之功矣武王克殷而封帝堯之
後於社也

帝舜姓虞又爲姚君媯武王克殷而封媯滿於
陳是爲胡公陳哀氏晉氏咸氏慶氏夏氏宗氏

來氏儀氏司徒氏司城氏皆媯姓也厲公孺子
完奔齊桓公說之以爲工正其子孫大得民心
遂奪君而自立是爲威王五世而亡齊人謂陳
田矣漢高祖徙諸田關中而有第一至第八氏
丞相田千秋司直田仁及杜陽田先礪田先皆
陳後也武帝賜千秋乘小車入殿故世謂之車
丞相及莽自謂本田安之後以王家故更氏云
莽之行詐寔以田常之風敬仲之又有皮氏占
氏沮氏與氏獻氏子氏鞅氏梧氏坊氏高氏筮
氏禽氏

帝乙元子微子開紂之庶兄也武王封之於宋
今之睢陽是也宋孔氏祝其氏韓獻氏季老男
氏巨辰經氏事父氏皇甫氏華氏魚氏而董氏
艾歲氏鳩夷氏中野氏越椒氏完氏懷氏不弟
氏冀氏牛氏司城氏閃氏近氏止氏朝氏教氏
右歸氏三伉氏王夫氏宜氏徵氏鄭氏日夷氏
鱗氏臧氏虺氏沙氏黑氏圍龜氏旣氏據氏磚
氏已氏成氏邊氏戎氏買氏尾氏栢氏戴氏向
氏司馬氏皆子姓也閔公子弗父河生宋父宋
父生世子世子生正考父正考父生孔父嘉孔

父嘉生子木金父木金父降爲士故曰滅於宋
金父生邾父邾父生防叔防叔爲華氏所逼出
奔魯爲防大夫故曰防叔防叔生伯夏伯夏叔
梁紇爲鄆大夫故曰鄆叔紇生孔子周靈王之
太子晉幼有成德聰明博達溫恭敦敏穀雒水
鬪將毀王宮欲壅之太子晉諫以爲不順天心
不若脩政晉平公使叔譽聘於周見太子與之
言五稱而三窮遂巡而退歸告平公曰太子晉
行年十五而譽弗能與言君請事之平公遣師
曠見太子晉太子晉與語師曠服德深相結也

乃問曠曰吾聞太師能知人年之長短師曠對
曰女色赤白女聲清汗火色不壽晉曰然吾後
三年將上賓于帝女慎無言殃將及女其後三
年而太子死孔子聞之曰惜夫殺吾君也世人
以其豫自去期故傳稱王子喬仙仙之後其嗣
避周難於晉家于平陽田氏王氏其後子孫世
喜養性神仙之術魯之公故有嬌氏后氏衆氏
臧氏施氏孟氏仲孫氏服氏公山氏南宮氏叔
孫氏叔仲氏子我氏子士氏季氏公鉏氏公巫
氏公之氏子干氏華氏子言氏子駟氏子雅氏

子陽氏東門氏公折氏公石氏叔氏子家氏榮
氏展氏乙氏皆魯姬姓也衛之公族石氏世叔
氏孫氏甯氏子齊氏司徒氏公文氏折龜氏公
叔氏公南氏公上氏公孟氏將者亦常在權寵
爲貴臣及留侯張良韓公族姬姓也秦始皇滅
韓良弟死不葬良散家貲千萬爲韓報讎擊始
皇於博浪沙中誤椎副車秦索賊急良乃變姓
爲張匿於下邳遇神人黃石公遺之兵法及沛
公之起也良往屬焉沛公使與韓信略定韓地
立橫陽君城爲韓王而拜良爲韓信都者司徒

也俗前音不正曰信都或曰司徒或勝屠然其
本共一司徒耳後作傳者不知信都何因疆妄
生意以爲此乃代王爲信都也凡栢叔之後有
韓氏言氏嬰氏禍餘氏公族氏張氏此皆韓後
姬姓也昔周宣王亦有韓侯其國也近燕故詩
云普彼韓城燕師所完其後韓西亦姓韓爲衛
滿所伐遷居海中畢公高與周同姓封於畢因
爲氏周公之薨也高繼職焉其後子孫失守爲
庶世及畢萬佐晉獻公十六年使趙夙御戎畢
萬爲右以滅耿滅魏封萬今之河北縣是也魏

穎又氏令狐自萬後九世爲魏文侯文侯孫瑩
爲魏惠王五世而亡畢陽之孫豫讓事智伯智
伯國士待之豫讓亦以見知之恩報智伯天下
紀其義魏氏令狐氏不雨氏葉大夫氏伯夏氏
魏強氏豫氏皆畢氏本姬姓也周厲王之子友
封於鄭鄭恭叔之後爲公文氏軒氏軍氏子疆
氏強梁氏卷氏會氏雅氏孔氏趙陽田章氏孤
氏王孫氏史龜氏羗氏羗憲氏濠氏皆衛姬姓
也晉之公族郤氏又班爲呂郤芮又從邑氏爲
冀後有呂錡號駒伯郤欒食采於苦號苦成叔

郄至食采於溫號曰溫季各以爲氏郄氏之班
有州氏祁氏伯宗以直見殺其子州黎奔又楚
以郄宛直而和故爲子常所妬受誅其子嚳奔
吳爲大宰懲祖禰之行仍正直遇禍也乃爲謫
諛而亡吳凡郄氏之班有冀氏呂氏苦成也溫
氏伯氏靖侯之孫欒賓及富氏游氏賈氏狐氏
羊舌氏季夙氏籍氏及襄公之孫孫廙皆晉姬
姓也晉穆侯生栢叔栢叔生韓萬傅晉大夫十
世而爲韓武侯五世爲韓惠王五世而亡國襄
王之孽孫信俗人謂之韓信都高祖以信爲韓

王孫以信爲韓王後徙王代爲匈奴所攻自降
之漢遣柴將軍擊之斬信於叅合信妻子亡入
匈奴中至景帝信子頽當及孫赤來降漢封頽
當爲弓高侯赤爲襄城侯及韓嫣武帝時爲侍
中貴幸無比案道侯韓說前將軍韓魯皆顯於
漢子孫各隨時帝分陽陵茂陵杜陵及漢陽金
城諸韓皆其後也信子孫餘留匈奴中駟氏豐
將氏國氏然氏孔氏羽氏良氏大李氏十族之
祖穆公之子也各以字爲姓及伯有氏馬師氏
褚師氏皆鄭姬姓也

太伯君吳端垂衣裳以治周禮仲雍嗣立斷髮
文身保以爲飾武王克殷分封其後於吳令大
賜北吳季扎居延州來故氏延陵季子闔閭之
弟夫槩王奔楚堂谿因以爲氏此皆姬姓也

鄭大夫有馮簡子後韓有馮亭爲上黨守嫁禍
于趙以致長平之變秦有將軍馮劫與李斯俱
誅有馮唐與文帝論將帥後有馮奉世上黨人
也位至將軍女爲元帝昭儀因家于京師其孫
衍字敬通篤學重義諸儒號之曰德行雍雍馮
敬通著書數十篇孝章皇帝愛重其文晉大夫

郇息事獻公後世將中軍故氏中行食采於智
智果諫智伯而不見聽乃別族于大史爲輔氏
晉大夫孫伯黶寔是司典籍故姓籍氏辛有二子
董之故氏董氏詩頌宣王始有張仲孝友至春
秋時宋有張白茂矣唯晉張侯張老寔爲大家
張孟談相趙襄子以滅智伯遂逃功賞耕於首
山後魏有張儀張丑至漢張姓滋多常山王張
耳梁人丞相張蒼陽武人也東陽侯張相如御
史大夫張湯增定律令以防姦惡有利於民又
好薦賢達士故受福祐子安世爲車騎將軍封

富平侯敦仁儉約矜遂權而好陰德是以子孫
昌熾世有賢胤更封武始遭王莽亂享國不絕
家凡四公世著忠孝行義前有丞相張禹御史
大夫張忠後有太尉張酺汝南人太傅張禹趙
國人司邑閭里無不有張者河東解邑有張城
有西張城豈晉張之祖所出邪優性舒唐鳩舒
龍舒其止龍酈淫叅會六院葉高國

慶姓樊尹駱

嫫姓鄧優

歸姓胡有何

歲姓滑齊

倚姓棲䟽

御姓署番湯

嵬姓饒攘殺

隗姓赤狄

姁姓白狄

此皆大吉之姓齊有鮑叔世爲卿大夫晉有鮑
癸漢有鮑宣累世忠直漢名臣漢酈生爲使者
弟商爲將軍今高陽諸酈爲著姓昔仲山甫亦
姓樊謚穆仲封於南陽南陽者在今河內後有
樊傾子舅姓封於鄧後田氏爲南陽鄧縣上蔡
北有古鄧城新蔡北有古鄧城春秋時楚文王
滅鄧至漢有鄧通鄧廣後漢新野禹以佐命元
功封高密侯孫太后天性慈仁嚴明約勅諸家
莫得權京師清淨若無貴戚勤思憂民晝夜不
怠是以遭羌兵叛大水饑饉而能復之整平豐

穰太后崩後羣姦相參競加譖潤破壞鄧氏天下痛之魯昭公母家姓歸氏漢有隗囂季孟短即大戎氏其先本出黃帝及徐氏蕭氏索氏長勺氏陶氏繁氏騎氏飢氏樊氏荼氏皆殷氏舊姓也漢興相國蕭何封鄼侯本沛人今長陵蕭其後也前將軍蕭望之東海杜陵蕭其後也御史大夫有敏系延壽南陵襄陽人也杜陵新豐繁其後也周氏邵氏畢氏榮氏單氏尹氏錙氏富氏鞏氏萇氏此皆周室之世公卿家也周召者周公召公之庶子食二公之采以爲主吏故世

有周公召公不絕也尹者本官名也若宋有太師楚有令尹左尹矣尹吉甫相宣王者大功績詩云尹氏大師維周之底也單穆公襄公頎公靖公世有明德次聖之才故叔嚮美之以後必繁昌苦城城名也在鹽池東北後人書之或爲枯齊人聞其音則書之曰車燉煌見其字呼之曰車城其在漢陽者不喜枯苦之字則更書之曰古城氏堂谿谿谷名也在汝南西平禹字子啓者啓開之字也前人書堂谿誤作啓後人變之則又作開古漆彫開公冶長前人書彫從易

泊作周書治漢誤作蠹後人又傳作古或復分
爲古氏成氏常氏開氏公氏治氏梁氏周氏此
數氏者皆本同末異凡姓之離合變分固多此
類可以一況難勝載也易曰君子以類族辯物
多識前言徃行以蓄其德學以聚之問以辯之
故略觀世記采經書依國士及有明文以贊賢
聖之後班族類之祖言氏姓之出序此假意二
篇以貽後賢今之焉也

潛夫論卷第九

開化圖書館
Wahwa Library

潛夫論卷第十

叙錄第三十六

夫生於當世貴能成大功太上有立德其下有
立言闡葺而不才先器能當官未嘗服斯役無
所効其勛中心時有感援筆記數文字以綴愚
情財令不忽忘芻蕘雖微陋先聖亦咨詢草創
叙先賢三十六篇以繼前訓左丘明五經先聖
遺業莫大教訓博學多識疑則思問智明所成
德義所建夫子好學誨人不倦故叙讚學第一
凡士之學貴本賤末大人不華君子務寔禮雖

媒紹必載於贊時俗趨末懼毀術故叙務本第

二

人皆智德苦爲利昏行汙求榮戴盆望天爲仁
不富爲富不仁將修德行必慎其原故叙過利

第三

世不識論以士卒化弗問志行官爵是紀不義
富貴仲尼所耻傷俗陵遲遂遠聖述故叙論榮

第四

惟賢所苦察妬所患皆嫉過已以爲深怨或因
類疊或空造端痛君不察而信讒言故叙賢難

第五

原明所起迷暗所生距諫所敗禍亂所成當塗
之人成欲專君壅蔽賢士以擅主權故叙明暗

第六

上覽先王所以致太平考績黜陟著在五經罰
賞之寔不以虛名明豫德音焉問揚庭故叙考

績第七

人君選士咸求賢能君司貢薦競進下材憎是
掎克何官能治買藥得鴈難以爲醫故叙思賢

第八

原本天人參連相因致和平機述在於君奉法
選賢國自我身姦門竊位將誰督察故叙本政
第九

覽觀古今爰暨書傳君皆欲治臣恒樂亂忠佞
溷淆各以類進常若不明而信姦論故叙潛歎

第十

夫位以德興德貴忠立社稷所賴安危是繫非
夫謹直貞亮仁慈惠和事君如天視民如子則
莫保爵位而全令名故叙忠貴第十一

先王理財禁民爲非洪範憂民詩刺末資浮僞

者衆本農必衰節以制度如何弗議故叙浮侈

第十二

積微傷行懷安敗名明莫恣欲而無悛容足以
愎諫聞善不從微安召辱終必有凶故叙慎微

第十三

明主思良勞精賢知百察阿黨不覈真偽苟崇
虛譽以相誑曜居官任職則無功效故叙寔貢

第十四

聖人養賢以及萬民先王之制皆足代耕增爵
損祿必程以傾先益吏俸乃可致平故叙班祿

第十五

君憂臣勞古今通義上思致平下宜竭惠貞良
信士咸痛數赦姦宄繁興但以赦故乃叙述赦

第十六

先王御世兼秉威德賞有建侯罰有刑渥賞重
嚴禁臣乃敬職將脩太平必媚此法故叙三式

第十七

民爲國基穀爲民命日力不暇穀何由盛公卿
師尹卒勞百姓輕奪民時誠可憤諍故叙愛日

第十八

觀吏所治鬪訟居多原禍所起詐欺所爲將絕
其未必塞其原民無欺給世乃平安故叙斷訟

第十九

五帝三王優劣有情雖欲超皇當先致平必世
後仁仲尼之經遭衰姦牧得不用刑故叙衰制

第二十

聖王憂勤選練將帥授以鈇鉞假以權貴誠多
蔽暗不識變勢賞罰不明安得不敗故叙勸將

第二十一

蠻夷猾夏古今所患堯舜憂民皋陶術叛宣王

中興南仲征邊今民日死如何弗蕃故叙救邊

第二十二

凡民之情與君殊戾不能遠慮督取一制苟扶私議以爲國計宜尋其言以詰所謂故叙邊議

第二十三

邊旣遠門太守擅權臺閣不察信其姦言今懷郡縣毆民內遷今又丘荒慮必生心故叙寔邊

第二十四

天生神物聖人則之著龜卜筮以定嫌疑俗工淺源莫盡其才自大非賢何足信哉故叙卜列

第二十五

易有史至詩有工祝聖人先成民後致力地梨
勸樂神乃授福孔子不祈以明在德故叙至列

第二十六

五行八卦陰陽所生稟氣薄厚以著其形天題
厥象人寔奉成弗修其行福祿不臻故叙相列

第二十七

詩稱吉夢書傳亦多觀察行事古驗不虛福從
善來禍由德痛吉凶之應與行相須故叙夢列

第二十八

論難橫發令道不通後進疑惑不知所從自昔
康子而有責云予豈好辯將以明真故叙釋難
第二十九

朋友之際義存六紀攝以威儀講習王道善其
久要貴賤不改今民遷久莫之能奉故叙交際

第三十

君有美稱臣有令名二人同心所願乃成寶權
神術勾示下情治勢一定終莫能傾故叙明忠

第三十一

人天情通氣感相和善惡相徵異端變化聖人

運之若御舟車作民精神莫能含嘉故叙本訓
第三十二

明王統治莫大身化道德爲本仁義爲佐思心
順政責民務廣四海治焉何有消長故叙德化

第三十三

上觀太古五行之運咨之詩書考之前訓氣終
度盡後代復進雖未必正可依傳問故叙五德
志第三十四

君子多識前言往行類族變物古有斯姓博見
同
故叙志民

姓第三十五

潜夫論卷第十終

清华图书馆
Tsinghua library

戊子六月得沈子又所藏宋板

翻刻本因命工印抄此書繆誤

頗多無從改定借筆點定一

次殊夫句讀後之讀者勿哂

七月初三日默菴

老人書

潛夫論時本不可讀此乃印

抄宋本者馮已蒼詳識於其

末校對亦精須珍之

開化圖書館

Kaichua library

開化圖書館


Kathua library

開化圖書館

Kaishwa library

開化圖書館

Kaishwa Library



潜

夫

論

開化圖書館

Kaizhou Library

二

開化圖書

Kaishwa Library



Inches

1

2

3

4

5

6

7

1

2

3

4

5

6

7

8

9

10

11

12

13

14

15

16

17

Centimetres

TIFFEN Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color